

LITHOGRAPHIÆ SVECANÆ

SPECIMEN SECUNDUM,

Telluris svecanæ petrifacta lapi-
desque figuratos varios
exhibens,

*Juxta seriem atque ordinem, quo in Museo
Metallico BROMELIANO servantur,*

In lucem editum

à

MAGNO VON BROMELL,
M. D.

SACR:UM MAJEST:UM SVECIAE Archiatro,

Et

Reg. Colleg. Med. Stockh. Præfide.

ANNO M DCC XX VII.

UPSALIÆ.



SECTIO PRIMA.

DE

Vegetabilibus, Fossilibus, & Lapidifaculis.

Quemadmodum intra animalium corpora, calculi, variæque in præcedenti specimine enumeratæ concretiones lapideæ generantur, ita eadem hæc animalia, illorumque partes variæ, haud minus ac vegetabilia, lapideam quandoque duritiem induere, & in lapides mutari possunt. Ejusmodi lapides *petrificationum* nomine cōmuni apud Lithographos comprehendi solent, & adcurate distingui debent ab illis lapidibus, qui casu, naturæ lusu, vel artificio quovis talem formam ac figuram acquisiverunt, quâ vegetabilia, animalia, vel res naturales atque artificiales, referunt, cum quibus tamen, præter figuram externam, nihil commune habent. Petrificationum horum numerus nuperis hisce temporibus adeo apud exterarum nationes adcrevit & adauctus est, ut iisdem recensendis, dies vix sufficeret. Verbo tantum monere debeo, quod ANGLIÆ figuratos lapides descripserint Cl. *Plotius, Leigh, Robinson, Lister & Luidius*. ITALIÆ petrificata exhibuerunt *Columna, Steno, Montius & Scilla*. HELVETICA, *Gesnerus, Muraltus, Vagner, Scheuchzerus & Langius*. GERMANICA, & quidem in specie SVEVICA, *Camerarius & Ebrhartus*. CANSTADENSIA, *Carl, Spléssius & Reiseliuss*. WÜRTENBURGICA, *Baubinus & Hiemer*. PALATINA, *Geyerus, Gerhardus, Verdries & Liebknecht*. HASSIACA, *Valentinus & Wolfart*. NORICA, *Bayerus*. WURCENBURGENSIA, *Beringer*. SILESIACA, *Swenkfelt, Volkmannus, Hermannus & Kundman*. SAXONICA, *Mylius, Linen, Schusteiuss & Rosinus*. QVERFURTENSIA, *Büttnerus*.

HILDESHEMENSIA, *Lachmund*. LUNEBURGICA, *Rei-
skius*. LUBECENSIA, *à Melle*. PRUSSICA, *Hellving,
Fischer & Wendius*. DANICA, *Schæctius*, ut alios innu-
meros nunc taceam, qui de patria sua optime meriti lau-
dabili hoc studii naturalis genere, famam atque sempi-
ternam gloriam sibi comparaverunt. Apud Nos in hac
mundi parte boreali, de petrificatis talibus, altum ha-
ctenus silentium fuit: præter perpauca enim illa, quæ
de figuratis nostris lapidibus *Olaus Magnus* in Hist. gent.
septentr. *Urbanus Hierne* in Manuduct. ad inveniend. me-
tall. & miner. *Iaur. Roberg*, in Dissert. de Astaco fluvia-
tili. *Jac. Ludenius* in Lithogenesia Macro- & Microcosmi.
J. F. Leopold in Itinere suo Svecano, & nuperrime *Eman.
Swedenborg* in quibusdam opusculis, sparsim flosculorum
instar hinc inde inseruerunt, neminem invenies, qui id
negotii sibi sumsit, ut in specie de iisdem ageret, vel in-
dicem petrificatorum nostrorum ederet in lucem. Cum
autem septentrionalis hæc regio naturæ hisce deliciis,
diluviiq; universalis reliquiis, haud minus, ac extera
quævis Tellus transmarina, abundet, & ego plurimis
jam annis petrificata nostra insigni numero sedula manu
ipse conquissiverim, vel per amicos mihi oblata compa-
raverim, me rem ingratham naturæ Mystis haud facturum
spero, si hæc eadem in Lithographiæ hocce Svecanæ
specimine secundo nunc enumeravero, & quidem tali
serie ac ordine, quo inter ejusdem generis Fossilia plurima
exotica in scriniolo nostro Lapidario servantur, divisa scili-
cet in petrificata vegetabilia & animalia, quorum agmen
tandem lapides naturæ lusu varie formati, claudent.

In antecessum autem, antequam pedem ulterius pro-
moveamus, necesse videri posset, ut quædam de horum
lapidum ortu, generatione ac origine præmitteremus;
verum enim vero, cum hoc alibi abunde factum sit,
telamque hanc dudum ante me Viri pertexuerint Cele-
berrimi, illustris *Leibnitius*, *Woodward*, *Steno*, *Scheuchzer*,
Bajerus,

Lithophytorum titulo generali omnia illa Fossilia comprehendimus, quæ vegetabilium & plantarum quas-
cunque partes referunt. Horum paucissima adhucdum
specimina in tellure nostra detecta sunt, non vitio qui-
dem soli natalis, quod iisdem, quibus cæteræ regiones
petrificatis abundare, persuasissimus sum; sed inquiren-
tium negligentia, cum nemo id negotii sibi sumserit, ut
sedulo in eadem inquireret. Perpaucae igitur illæ Litho-
phytorum species, quæ hætenus ad manus nostras per-
venerunt, trium præcipue generum sunt: Musci scilicet
terrestres species nonnullæ; foliorum impressiones ac ve-
stigia in lapide fissili vel calcario conspicua; & lignorum
frustula

frustula lapidea. Præter hæc, fructuum quidem officulis, seminibus, arborumque radicibus, ramulisque haud absimiles lapides sæpius heic vidimus, qui tamen propius lustrati, cum potius pro lapidibus naturæ lusu figuratis, quam veris petrificatis haberi debeant, eos omnes ad tertiam & ultimam speciminis hujus sectionem relegavimus. Ad vera autem Lithophyta pertinere videntur:

No. 1. *Lapis cinerei coloris fissilis foetidus, Suillus dictus, in superficie ostendens Musci ramosi capillamenta nigra, subtilissimo quasi penicillo expressa. Inventus in arenariis paræcie Giärstad, prope oppidum Schenningam in Ostro gothia.*

Per suillum sive foetidum lapidem quid intelligamus, alibi; & quidem in specimine tertio, ubi de saxo calcario agendum, docebimus. Qui in hoc memorato lapide depictus cernitur muscus, generis est saxatilis, repentis, capillacei, non ipsam lapidis substantiam, quemadmodum in dendritis Florentinis & Germanicis nonnullis videre licet, penetrans, sed lapidis in extrema superficie duntaxat subtilem figuram suam ostentans. Cl. Scheuchzerus in Misc. Curios. Germ. Dec. 3. an. 5. appendice dendritæ Oeningensis similem speciem memorat, quæ ferro vel lapidibus affricta cornu ustum redolet.

2. *Dendrites filiceus Scanicus, sive filix albicans musci capillacei vel fruticeti exsurgentis subtilem imaginem eleganter exhibens. Repertus in agro Lijdgothiano ad pagum Kropp*

Hic cum dendrita Sinaitico Ferr. Imperati Hist. Nat. Lib. 24. magnam affinitatem habet.

§. II.

3. *Muscus terrestris vulgaris, crusta tenui tofacea leviter induratus, repertus prope fontem quendam ad radicem montis Mosseberg dicti in Westrogothia.*

4. *Muscus terrestris vulgaris, cortice calcario candido obdurtus, & hinc inde in tofum mutatus.*

Perelegans hoc concretum tofaceum, in suprema sua parte integrum adhucdum & viridem muscum continens

tinens, inventum est in insula *Gothlandia*, ad pagum *Nygården*, haut procul ab antiqua urbe *Wibby*, ubi ad maris litus ex colle quodam arenoso aqua limpida continuo decurrens, muscum, gramina, & quasvis alveo præcipiti obvias quisquillas, cortice tali calcario niveo obducit. Rarissimum sane exemplum, cum paucissimæ tales aquæ petrificantes hæctenus in *Svecia* observatæ sint. Meminit quidem *Albertus Magnus* Lib. 1. Mineral. Tract. 1. Cap. 7. celebris cujusdam in *Gothia* fontis, tanta petrificandi virtute instructi, ut objectas non tantum res quaslibet in lapideam substantiam transmutaverit, sed cujus guttæ marginibus illius adpersæ statim in lapillos concreverint. De indole hujus fontis ut certior fieret *Fridericus* Imperator, jussit chirothecam sigillo munitam, mediatenus immergi, & quidem post dies aliquot partemmersam lapideam evasisse, reliquam, ut erat, remansisse pelliceam. Verum cum de hoc fonte Gothico hodie apud nos, neque in *Gothia*, neque *Gothlandia* aliquid, ne per famam quidem, certi habeatur, contingere potuit, ut idem ille collatus & obstructus, hisce forsan temporibus perierit, vel vim suam petrificam perdiderit; quod aliis quoque ejusmodi scaturiginibus accidisse observatum est.

ARTICULUS SECUNDUS.

De foliorum impressionibus & vestigiis in variis lapidibus.

§. I.

PARIA cum musco fata subire coguntur arborum folia, & ramenta, quando diu aquis calcariis immersa jacent, ut tandem crusta rosacea obducantur, quæ illorum figuram ac typum retinet, postquam ipsa folia aut ramenta intus corruptione jam perierunt. Hujus generis sunt:

No. 1. *Cerasi foliorum vestigia roso candido calcario impressa.*

Orig-

Originem suam hic lapis debere videtur cæmento, quo quondam extructum fuit pantheon Lundense in *Scania*. Ad hujus enim rudera, teste amicissimo & celeberrimo M. D. *Stobæo*, cui eundem debeo, satis frequens occurrit.

2. *Roris marini sylvestris, nostratibus poris dicti, foliola tenuia, nigricantia, expressa in lapide calcario cinereo, invento in arenariis memoratis Ostrogothicis, prope oppidum Schenningam.*
3. *Variarum plantarum foliaceæ impressiones & vestigia in lapide fissili nigro: ex monte Dalaberg in Westrogothiæ paræcia Dahla.*

Genuina horum foliorum nomina exprimere nunc nequeo; quamvis etenim nonnulla pinnulis suis filicem; alia angustia & longitudine graminis speciem, quædam acumine ac tenuitate salicem, alia ericam, & nymphæam minimam, referre videantur, determinare tamen, quo præcise pertineant, non audeo, donec ab provinciæ illius, nunc autem Nericiensis, Medico experientissimo & deliciarum harum cultore indefesso D. D. *Hesselio* plura & elegantiora lapidis hujus plantigeri specimina accepero.

ARTICULUS TERTIUS.


De Lithoxylis.

§. I.

Lithophytorum agmen tandem claudent lithoxyla sive in lapides mutata ligna varia. Notissimum hocce apud exteros petrificati genus, heic apud nos non nisi rarissime occurrit; quamvis enim titulo illo, lignique petrificati nomine, lapides plurimi, insignis interdum molis ac magnitudinis sæpissime oblatisint, figura sua externa ac superficie ligna arborumque truncos apprime referentes, adcuratius tamen lustrati iidem cum ligno, præter figuram externam, nihil commune habuerunt, verum

verum vel lapidis cujusdam corallini porosi species fuerunt, vel asbesti fossilis genus quoddam fibrosum, argentifodinis nostratibus valde familiare, vel demum laxum commune, ab injuriis externis adeo exesum & mutatum, ut lignum, arborisque truncum facie sua externa haud inepte finxerit. Ad vera tamen lithoxyla accedere videntur:

I. *Dryites sive ligni quercini coagulum lapideum*, inventum inter urbem Upsaliam, & officinam ferrariam Wattholmensem in Uplandia.




B

Eximi-

Eximium hocce concretum lapideum, in quo adhuc-
dum substantia ligni putrida lapidi hinc inde interspersa
superstes cernitur, inter rariora sua servaverat olim Ce-
leberrimus Professor Upsalensis *Joan Schefferus*, una cum
sequenti relatione: *Dryitem hunc prope Upsaliam, ad molam*
quandam farinariam, haud procul ab officina ferraria Watt-
holmensi distitam, inventum, Celeberrimo Professore Olao
Rudbeckio debeo, qui simul retulit se in eodem loco inve-
nisse caudicem quercinum, cujus maxima pars in lapidem mu-
tata erat, reliqua superstite adhucdum integra & immuni.
Transmutationis hujus veritatem ut perciperem, ipsum-
que truncum saxeum ut invenirem, ego, illo tempore,
quo *Upsaliæ* Medici provincialis, & adjuncti munere fun-
ctus sum, sedulam navavi operam, omnemque circa
hanc officinam Wattholmensem lapidem movi & exami-
navi, sed frustra & semper sine successu. Transmisit qui-
dem eodem illo tempore *Upsaliam* amicus quidam mei
desiderii memor, ingentem truncum lapideum e prato
quodam prope memoratam officinam ferrariam, erutum
& a plebe ibidem quercus petrificata titulodonatum,
qui superficie sua corticali, substantiaque fibrosa ac stria-
ta, stipitem ligneum primo intuitu haud inepte mentie-
batur. Sed accuratius examinatus, a nostro recensito
concreto, omnique ligno quercino plane differebat; nec
aliud erat nisi saxum commune ab aëris ac pluviae injuriis
ita exesum & mutatum, ut stipitis quercini speciem nunc
præ se ferret. Ejusdem generis atque originis fuisse et-
iam crediderim solidum illum, durum, admodumque
gravem truncum saxeum, cujus meminit *Jac. Monthe-
lius* in dissertatione sua de aquis mineralibus p. 64, quemque
trunci quercini Uplandici in lapidem mutati titulo, pu-
blice *Upsaliæ* monstravit.

II. *A dryite, gravitate sua, figura, totaque facie differt aliud pro ligno petrificato exhibitum, & hic ad latus depictum frustulum, quod ex aquis vitriolicis cuprifodinæ Fahlunensi in Dalekarlia, extractum est.*



Ad quodnam ligni genus frustulum hocce præcise pertineat, definire nequeo, cum tubulosa ac cavernosa sua substantia, ossis particulam potius, quam lignum referat. Quod autem hæ aquæ Fahlunenses, insignem indurandi vim obtineant, testantur non tantum varii ibidem in fodinis superstites stipites omni lapide duriores, verum etiam humani corporis partes diversæ inde extractæ, integræ adhucdum & a corruptione conservatæ; de quibus inferius in sequenti sectione latius agemus.

§. II.

Præter memorata hæcce lithoxyla, Cl. *Volkmannus* in *Silesiæ subterr. part. prior. Cap. IV. §. 9.* ex *Wormii* museo alia bina lithoxyli Svecani genera recenset, unum admodum grave, candidum, micæ instar splendens, & marcasita gravidum, repertum prope *portum Caroli* (*Carlsbaswen*) in *Scania*. Alterum nigrum, ponderosum, totumque in marcasitam mutatum, in *Finlandia* ad oppidum *Helsingfors* effossum. Verum enim vero cum nihil tal, hætenus, quod sciam, ab ullo ibidem visum fuerit, nen ipse *Wormius*, qui in maiorem fidem citatus, eorundem

in illa musei editione, quam possideo, mentionem fecerit, nos illa mittimus, persvasissimi, quod, si eadem in locis memoratis inveniantur, nihil aliud sint nisi marcasitæ figuratæ species, ligni faciem ac figuram præ se ferentes. Ad veri lithoxyli genium & indolem propius accedere videtur, lignum faginum lapideum, quod possideo, elegantissimum, exoticum quidem & peregrinum, ut puto, sed pro indigeno & septentrionali, a Viro rerum naturalium amantissimo venditatum. Lapis est, uti in *Tab. fig. 1.* videri potest, septem digitorum longitudinem & trium latitudinem capiens, ex cinereo albicans, assu- latim coagmentatus, ita ut distincte quatuordecim ad minimum numerari possint lamellæ, partim integræ, partim mutilatæ, inter quas excurrentes hinc inde fibræ, pecti- nes, lineæ, ductusque lignei non modo exacte discernun- tur, verum etiam ipse nodus, sive protuberantis ramuli vestigium adeo manifeste ab utroque latere conspicitur, ut nisi manibus tangas, ac pondus duritiemque explores, adhucdum lignum faginum esse jurares. Elegans hæc phegitæ exoticæ species, aliud longe elegantius, peregri- num quoque, sed inter omnia quæ unquam vidi pulcher- rimam & pretiosissimum lithoxylon in memoriam revo- cat. In museo scilicet splendidissimo Illustrissimi Comi- tis, Senatoris Regni, aulæque supremi Mareschalli, Dn. *Nicodemi Tessin* hic *Stockholmie*, stipes cernitur insignis magnitudinis, non in saxum commune, uti proxime me- morata ligna, sed in gemmam pretiosissimam, achatem nimirum totus commutatus; in quo externus cortex, medulla intermedia, fibræ lignosæ, circuli concentrici, cæteraque trunci arborei vestigia usque adeo adcuratè distinguuntur, ut de ejusdem vera transmutatione nemo facile dubitare possit. Thesaureoli hujus rarissimi effigi- em & descriptionem adcuratam promisit Comes beni- gnissimus, quam omnes mecum historiæ naturalis cultor- es summo desiderio expetunt & expectant.

§. III.

Occasione naturalis hujus mutationis lignorum in lapides, non possum, quin verbo simul referam infelicem successum quorundam experimentorum varia corpora lignosa artificiose indurandi. Arcani hujus auctor est *Johannes Kentmannus*, vir alias candidus, qui in *Nonjenciat. Rer. Fossil. Misn.* p. 39. artificium hocce sequentibus verbis proponit: *Ex alno*, ait, *ut fiat lapis artificiose imponi debet lignum, quantæ velis magnitudinis, in labra illa ampla aenea, in quibus lupulus coquitur, ad faciendam cerevisiam; cumque percoctus abunde lupulus est, eximitur idem lignum & arena vel glarea in ipsis cellariis obruitur per triennium, inde cum extractum fuerit, duratum in lapidem apparet, e quo potissimum cotes fiunt, quibus ad ferramenta acuenda mensarii utuntur.* Alterum experimentum *Nic. de Blegni Gallus* in *Zodiaco Med. Gall.* an. 2. mens. Sept. obs. 2. sequentibus verbis exhibet: *ut in lapidem convertatur quodcunque genus corporum siccorum, & poris præditorum, accipe salis gemmei, aluminiis rupei pulverisatorum, pulveris silicum non ustorum, calcis exstinctæ, aceti albi ana partes æquales, commisceantur cuncta. Ubi fermentatio inceperit, adde corpus, cui lapidis formam inducere animus est, sive sint ossa humana, sive lignum admodum aridum & porosum, sive os sepia, aut quodpiam simile, a materiis prædictis, mediante fermentatione penetrabitur. Hæc simul in unum corpus coalitura sunt, adeo ut duritiem & soliditatem, intra quatrimum, aut ad summum sex dierum spatium sibi, comparatura sint.* Tertium tandem indurandi modum tradit fide dignissimus *Boyleus* in exercit. 2:da de utilit. & præstant. philos. Nat. §. 4. hisce verbis: *Mihi nunc incidit, quod aliquoties lapideæ maxime corpus duritiei, intra semihorii spatium imo citius in ipso aqua medio produxerim. Nucis myristica scilicet quantitatem bene & recente calcinato ala-*

bastro junctam, panniculo illigatam, & in pelvis aqua repleta fundum injectam, statim in lapideam concretionem mutari vidi. De effectu horum experimentorum certior ut fierem, singula, qua potui circumspeditione, institui, & quidem Kentmannianum, quod diutinum tempus postulat, bis, Blegnianum ter, & Boyleanum sæpius, sed semper sine successu. Ita ut arcana hæc vel figmentis, vel experimentis rarissime, si unquam, succedentibus annumerare debeam, haud ignarus verum petrificationis modum longe alia methodo tentari debere, uti expertus sum, & alio loco, Deo volente ostendam.

CAPUT SECUNDUM.

DE

Vegetabilibus marinis lapideis ex terra effossis.

ARTICULUS PRIMUS,

De Corallis fossilibus.

§. I.

Lithophytorum inopiam compensabit spero corallinorum nostrorum lapidum insignis numerus, quorum tanta copia, tantaque varietas apud nos occurrit, quantam vix aliis regionibus suppetere scimus. Vegetabilium autem marinarum fossilium titulo intelligimus non tantum corallia quævis fossilia, verum etiam omnes cujuscunque generis marinarum æmulos corallinos lapides, qui ex tellure effodiuntur; cujus generis sunt: madrepora, porus, retepora, alcionium, tubularia, lithostrotion, fungites, astroites, columellus, porpites, glomellaria, branchiale, astropodion, cæteraque a Cl. Lithographis Anglicanis *Plotio* & *Luidio* inventa nova nomina, quæ singula tamen ad sequentes tres classes facile reduci possunt.

Nos

Nos à coralliis nostris fossilibus incipiemus, quorum ingentem copiam suppeditat maris balthici insula celebratissima *Gothlandia*, cum adjacentibus litoribus, quamvis hoc idem mare veri coralli marini specimna non nisi rarissime exhibuerit.

1. *Planta marina corallina à Ferrando Imperato Sertularia vocata, candida & foliosa, coralli albi squammei ramo adnata, reperta in Oceani litore prope oppidum Strömstad.*

Planta hæc corallina ab Imperato in Hist. nat. Lib. 27. Cap. 12. depicta, ex meris foliolis semicircularibus candidis constat, quæ in vertice, minutissimo petiolo sibi invicem adhaerentia, continuatum frondium absque trunco costulisque, filum efficiunt.

2. *Madrepore sive coralli fossilis punctulati ramulus lapidi calcario nigricanti inherens.*

Ex monte Billingen dicto, in Westrogothiæ territorio wallehærad.



3. *Madrepore fossilis varii ramuli simplices & ramosi, reperti in insula Oelandia. Hæc madrepore species cum inferius describendis coralliis Gothlandicis punctulatis magnam affinitatem habet.*

4. *Pori, madrepore ac coralli marina fragmenta exigua, collecta in arena litorali lacus Lomensis in Scania.*

5. *Coralliorum fossilium ramusculi tenuissimi silicei, tophe candido, nec non silici nigro adnati. Ex ora maritima ejusdem lacus Lomensis.*

6. Coralli-

6. *Coralliorum fossilium ramuli majores silicei & semidiaphani reperti intra sabulum ejusdem lacus.*
7. *Madrepore ramuli calcario lapidi incano immerfi. Ex agris monasterii Sancti Ovidii in Scaniæ territorio Fersiano.*
8. *Ejusdem madrepore fossilis ramuli teretes, in nodos aut genicula virgularum instar distincti, cortice scabro & verrucoso circumdati. Ex ejusdem cænobii agris in territorio Fersiano.*
9. *Lapis calcarius grisei coloris multis trochitis atque coralliorum ramulis minoribus gravidus. Ex insula maris baltici Gotblandia, unde lauta quæ sequitur coralliorum fossilium supellex hausta est.*
10. *Lapis calcarius albicans, in superficie insignem tenuissimorum coralliorum stragem exhibens. Ex ejusdem insule litore marino.*

11. *Coralliorum exilium coagulum lapideum, eo, quo in figura addita cernitur, modo, eleganter coalitum. Ex eadem insula.*



12. *Lapis calcarius fuscus, cujus superficiem madrepore majoris ramulus, lambricum repentem representans nitide exornat. Ibidem.*

13. Coralli

3. *Corallii fossilis subalbidi ac levis, ramuli tenues geniculati ac ramosi. Ex insula Carolina montibus calcariis in Gothlandia.*




14. *Madrepore sive coralli fossilis punctulati ramuli diversa magnitudinis ac crassitiei, à digiti minimi ad pollicis latitudinem ascendentes. Ex eadem insula Carolina.*



Tenuioris ramuli imaginem figura addita sistit.

15. *Madrepore fossilis major bifurcata, sive corallium cinerei coloris fossile ramosum, porulis stelliformibus pervium. Ex*



iisdem insula Carolina montibus calcariis.

Magnitudinem & iconem hujus ramuli figura addita exhibet, præter quem alium ejusdem generis ramulum, sed elegantiores possideo, cujus in porosam & stellatam

latam superficiem, si oculos armatos adcuratius intendamus, dici non potest, quanta se offerat elegantia.

16. *Madrepora placentiformis fossilis, compressa ac tenuis, lapidi calcario adnata, reperta in insula Gothlandiæ litore.*
 17. *Madrepore fossilis ramosæ varii ramuli tenues, valdeque compressi ac complanati. Ex eadem insula.*

Quod coralliorum horum fossilium materia, seu substantia, primo ab initio mollis fuerit ac fluida, insignis hæc eorundem tenuitas & figura placentiformis, quæ à coralliorum rotunditate naturali quam maxime abscedunt, haud obscure indicare videtur. Hypothesin hanc aliis inferius recensendis speciminibus ulterius probabo.

§. II.

18. *Pori fossilis subtilissime punctati varia specimina spherica & tuberosa, reperta in agris cænobii St. Ovidii in territorio Fersiano & Scania.*

Cum madrepora, specie quidem & foraminulorum crebritate convenit porus, sed ab eadem, omnique coralliorum genere, differt tuberositate; quippe qui non in ramos & genicula, quemadmodum corallia dividitur, sed in grumos & tubercula protuberare solet.

19. *Porus tuberosus fungiformis, spheroides, multis rotundis foraminibus pervius, cariosam & a vermibus exesam rapam apprime referens. Ex Scania.*

Rapiformis hicce lapis, in cella Viri cujusdam reverendi inter alias rapas in arena per hiemem servatas, inventus, colore, magnitudine, superficie rugosa, foliorum vestigio circulari, totaque sua facie tam pulchre imitatus, ut quemvis facile fallere posset; adcuratius tamen lustratus & ad rationis lancem examinatus, genium suum prodit, ad porum tuberosum multis foraminulis dotatum referendus.

20. Pori majoris, tuberosi, ac inequalis varia specimina, frondiporæ ad instar cribriformia. Ex insula Gothlandia.
21. Porus insignis magnitudinis globosus, cujus basis integra & laevis, superficies autem multis foraminibus majoribus notata. Ex eadem insula.
22. Porus minor fossilis globosus cribriformis, foraminulis quasi acu factis plenus, cui a latere pedunculites elegans adnascitur. Ex ejusdem insulae montibus calcariis.
23. Pori fossiles ovales magni, cribriformes, quorum capitulum, seu pars superior punctulis majoribus impressis, veluti totidem stigmatibus, per totam superficiem notatur; inferior autem umbilici instar in annulos inequales stalacticos protuberat. Ex eadem insula Gothlandia.

Hæc pori singularis quædam species est, digna sane quæ icone exprimeretur;

24. Porus tuberiformis, figura sua ac magnitudine tubera terrestria referens. Ex Gothlandia.



25. Porus fossilis Gothlandicus stellatus verrucosus, facie sua externa radicem cariosam apprime exprimens.
26. Porus fossilis pileiformis stellatus Gothlandicus, in aspera sua & verrucosa superficie porulos rariores stelliformes distincte exhibens, ac proinde astroites à nonnullis vocatus.

Verbo hic monere debeo, quod astroitæ seu stellaris lapidis nomen, Lithographis adeo familiare, val-

de ambiguum sit, & diversissimi generis lapidibus sine distinctione imponi soleat. Astroitæ enim nomen primo illis silicibus & fissilibus lapillis tribuitur, qui in superficie stellulares icones umbratiles depictas gerunt, & ad naturæ lusus referri debent. Deinde etiam eodem nomine superbit entrocho columnari similis quædam species asteriæ, quæ ad animale regnum pertinet, & pro stellæ cujusdam marinæ radio, pede sive officulo haberi debet. Astroitæ nomine porro comprehenduntur marinæ illæ & tubulosæ aliquando undatæque productiones coralloides, quæ ex oceano Indico museis Europæis inferuntur. Eodem præterea nomine veniunt fungitarum minimorum coagula quædam lapidea, capitulis suis sphaericis ac radiatis, stellulas exiguas referentia. Astroites tandem appellatur etiam madreporæ vel pori illa species, cujus superficies foraminulis stelliformibus exornatur. Qui hic memoratur porus stellatus, seu astroites fossilis, ex ultimo hoc genere est, in ima & adversa parte umbilicatus. Præter quem alius ejusdem generis astroites Gothlandicus adest, cujus stellulæ longe subtiliores & in superficie depictæ quasi apparent; magnam similitudinem habens cum *Scheuchzeri* astroite illo Helvetico minoribus stellis, quem in specim. Lithogr. Helvet. fig. 52. & 53. depictum exhibuit. Reliquæ astroitarum species inferius in specimine hocce recensentur.

27. *Retepora sive eschara marina Imperati lapidea Gothlandica.*

Hoc titulo ac nomine appellare licet tenuem hanc lamellam lapideam reticulatam, subtilissimis punctulis impressis, veluti totidem stigmatibus per totam superficiem notatam, quæ figura quam proxime ad illam reteporæ Helveticæ speciem accedit, quâ Scheuchzerus in Lithog. Helvet. fig. 16, depictam sistit.



28. Reteporæ alia species, telam subtilem textura sua quodammodo referens, lapidem calcarium candidum corticis reticulati instar involvens. Ex eadem insula Gothlandia.


ARTICULUS SECUNDUS

De Lapidibus Corallinis.

§. I.

COralliis succedunt lapides corallini fossiles, à coralliis distincti, quod loco pororum, tubulos exiguos habeant, nec nisi rarissime divaricentur, & in ramos dividantur. Huc pertinet

1. Tubularia fossilis candida, ex tubulis brevioribus angustioribus constans, & tribus ordinibus fistulosis distincta.



Juxta Botanicorum principem *Tournefortium*, cujus tanquam svavissimi quondam præceptoris vestigia, in coralliorum distinctione lubens sequor, *Tubularia* vocatur plantæ marinæ quoddam genus fere lapideum rubrum coralliis affine, sed ex innumeris tubulis constans, organi musici æmulum. Cum quo exotico vegetabili marina hæc nostra tubularia fossilis Gothlandica satis accurate convenit, nisi quod color ejusdem candidus sit, & tubuli, ex quibus tota componitur, breviores videantur, strato tenui lapideo hinc inde intersecti, quemadmodum ex adposita imagine patet. Pro patria agnoscit hæc eadem insulam Gothlandicam, ad cujus litora reperta est.


2. *Tubularia fossilis candidæ Gothlandicæ alia species manu artificiosa in cubum formata & polita, ut cellule interiores, totaque lapidis substantia tubulosa atque cavernosa oculis melius pateat.*
3. *Tubularia fossilis albicans calcaria, ex tubulis exiguis innumeris concreta, lignum faginum petrificatum utcunque referens. Ex agris ad cænobium St. Ovidii in Scaniæ territorio Fersiano.*

Spon-

Spongiosa atque tubularis lapidis hujus structura interior, diffracto eodem facile dignoscitur. Verum cum exterius saxo calcario hinc inde conspurcetur, tubulorum series non adeo aperte distinguitur, uti in proxime memorata Tubularia Gothlandica.

§. II.

4. *Tubularia fossilis fistulosa candida undata, & catenulata.*




Ad tubulariæ species eodem jure refero speciosissimum hunc & elegantissimum litoris Gothlandici foetum corallinum, cujus effigiem sed minus distinctam, & accuratam figura hæc exhibet. Substantiam lapidis hujus si consideremus, duplex hæc est, corticalis scilicet, quæ tota lamellata, fistulosa, cinerea, ubique ductu gyrato ac erratico sese circumvolvens: & medullaris, quæ candidior, calcaria, omnes tubulos & inter eosdem relictæ interstitia arcte adimplens. Ad structuram autem ipsius lapidis

lapidis quod attinet, hæc singularis est. Ex longis etenim teretibus, albis & rectilineis tubulis totus componitur, qui articulata serie arctissime coeunt, lamellas tenues constituunt, ductu tortuoso ac gyrato mire convolutas, tandemque in superficiem anfractuosa ac catenulatam desinentes. Unde lapis hicce apud nonnullos astroitæ tubularis faviginosi, vel fungitæ undulati reticularis nomen contraxit. Propius eundem accedere crediderim ad illud coralliorum genus, quod maxime reverendus & à me ob honorificam nominis mei mentionem, piumque simul additum votum, in *Lithographia sua Angerburgica*, nunquam sine veneratione nominandus, celeberrimus G. A. HELWING, in laudatissimi operis *part. 1. Cap. 6. sect. 4. No 15.* titulo Coralli dendrici catenulati descripsit, & ibidem *Tab. V. fig. 1.* depictum dedit, nisi quod hoc nostrum specimen Gothlandicum, magnitudine, elegantia ac nitore illud Angerburgicum longe antecellat.

5. *Ejusdem tubulariæ Gothlandicæ fossilis ac catenulatæ aliud elegantius specimen, in quo lamellarum tortuosi anfractus latius explicantur, & tubulorum catenula corallina sive rete articulatum mirabile distinctius extenditur, artificio adeo miro ac singulari, ut icone melius quam verbis exprimi possit. vid. Tab. fig. 2.*

6. *Ejusdem tubulariæ fossilis catenulatæ Gothlandicæ aliud specimen, memoratis durius & quasi siliceum, cujus reticularis & catenulata superficies à fluctibus marinis adeo exesa & deterfa est, ut elegantiam suam naturalem plane perdiderit,*

quem-



quemadmodum ex appolita effigie liquet; in qua tamen fungitæ minoris, e latere lapidis hujus exsurgentis, vestigium (a) non bene exprimitur.

7. *Ejusdem tubulariæ Gothlandicæ fossilis alia speciès tenuis; utrinque plana, reticulata atque catenulata, cujus tubulosa & ab aquarum fluctibus deterfa superficies, catenulam corallinam tam affabre ab utroque latere ostendit, ac si aurifabri manu fabricata, vel opus Phrygium esset, figura sua reticulari mirabile vasorum lymphaticorum rete haud inepte representans*

D

Figura




Figura sua externa reticulari convenire videtur hic lapis, cum illis corallinis lapidibus, quos proxime laudatus Cl. *Helwing* l. c. N. 23. & 40. in Tab. V. fig. 6. & Tab. VI. fig. 1. exhibuit; neque multum ab illis lapidibus differt, quos *Buttnerus* in *Coralliographia subterranea* Tab. 1. fig. II. & *Volkmannus* in *Siles. subt. part. 1. cap. IV. §. 46. Tab. XVIII. fig. 7. & Tab. XX. fig. 3.* depictos, nomine *Corallii laterulati* descripserunt.

8. *Ejusdem tubulariæ Gothlandicæ fossilis alia species, tubulari sua & cavernosa structura apum cellulas seu favos apprimè exprimens.*

Cum astroite pyxidato & faviginoso Anglicano à *Luidio* in *Ichnogr. Lithophyl. Brit. Class. 2. N. 167.* memorato an idem sit hic lapis, definire non audeo. Majorem similitudinem habere videtur, cum illa astroitæ specie, quam favi apum mellisque sylvestris petrificati *Livonici* titulo depinxit *Mylius* in *Saxon. subterranea. part. II. relat.*

relat. 3. p. 31. fig. 2. & 3.] Quæ ad tubularias, uti hæc nostra, referenda.

9. *Tubularia fossilis catenulata filicea Scanica, Gothlandicæ superius sub numero 6. memorata, similis, sed ab aquarum fluctibus admodum exesa & deformata.*

Tubulariam hanc, una cum præcipuis petrificatis meis Scanicis, debeo benevolentia Celeberrimi, & in hac studii naturalis parte versatissimi D. ni Professoris Kiliani Stobæi, cujus proinde brevem sed elegantem de hoc lapide relationem simul hic adducam: *porus bicce, ait, tubularis litoris Lomensis in Scania alumnus, e tubulis albis rectilineis compositus, interjecta hinc inde materia lapidea nigra, jucunde representat organum parvum musicum, & figuræ, quam Joh. Bauhinus Hist. plant. T. 3. p. 796. nomine tubulariæ exhibet, similis est. Substantia lapidis filicea existit & nigra, canales autem in eodem conspicui, tubulosi, atque materia cretacea alba infarcti, quorum extrema in basi, ductus catenatos & anfractuosos efficiunt. Quæ omnia quoniam exacte conveniunt cum descriptione tubulariæ Gothlandicæ superius tradita, nihil quod addam, habeo.*

§. III.

10. *Lapis coralloides, albicans sinuosus & vermiculatus, in superficie sua exhibens corpus teres tubulosum, transversim ubique rugatum sive annulatum, multis gyris ac anfractibus, Lumbrici terrestris ad instar varie inflexum.*

Novum hocce in litore Gothlandiæ repertum lapidis corallini genus, lumbricum petrificatum haud inepte referens, quo referam, ignoro, persuasissimus tamen, quod idem verus lumbricus nunquam fuerit, sed vel tubulariæ cujusdam, vel corallii sinuosi ac undulati species nondum descripta.

11. *Lapis calcarius coralloides radiatus Gotblandicus, cujus superficies, densas elevatas & a centro ad peripheriam excurrentes lineolas tales radiatas exhibet, quales figura hæc addita exprimit.*



Hic aqua iterum hæret, nescius ad quam corallinorum lapidum speciem, concretum hocce lapideum, referre debeam. Quod si ad fingenda nova nomina facilis essem, & lusus naturæ a veris petrificatis accurate adeo distinguere nollem, crediderim me in hoc lapide videre vel solis quendam florem Indicum, petala sua pandentem, vel fungitæ majoris capitulum inversum radiatum, & super lapidem diffusum. Nunc Davum me fateri malo quam Oedipum.



12. *Ejusdem generis alius lapis corallinus Rizoides, bryonia vel alius vegetabilis radicem representans, cujus concava pars radiata atque sulcata, circularibus annulis distinguitur; convexa autem multis foraminulis notata, & quasi erosa cernitur.*

Vide figuram a latere, in qua lapidis hujus convexa pars exhibetur. *Gotblandiam* pro patria quoque agnoscit hic lapis, ubi ejusdem generis plurimi reperiuntur, non nisi magnitudine & pororum crebritate in superficie externa differentes.

ARTICULUS TERTIUS, *De Fungitis,*

§. I.

NEc copia nec varietate generi corallino cedunt Fungitæ nostri fossiles. Fungitæ autem fossilis nomine non fungos terrestres petrificatos hic intelligimus, sed lapides fungiformes, in Oceani fundo quem-

D 3

admodum

admodum corallia, pori, tubulariæ, reliquaque vegetabilium marinorum supellex, proprio suo modo provenientes, & fungos terrestres quodammodo figura sua imitantes. Hujus generis sunt

1. *Fungites cinerei coloris, cujus striatum capitulum nitide super lapidem calcarium fuscum expanditur & explicatur. In fodina aluminaria Andrarumensi in Scania inventus.*
2. *Fungitarum vestigia in lapide calcario incano conspicua. Ex agris prope Cænobium St. Ovidii in Scaniae Territorio Fersiano.*
3. *Columellus, seu fungites minor lapidi calcario griseo immersus. Ex eodem in Scania loco.*
4. *Fungitæ minimi cum capitulis striatis, collecti in litore lacus Lomensis in Scania.*
5. *Fungitæ fossiles majores rotundi, quorum capitula diffusa intusque profunde striata, pediculi autem admodum breves sunt. Ex insula Oelandia. Hi cum sequentibus fungitis Gothlandicis magnam affinitatem habent.*
6. *Fungitæ varii diversæ magnitudinis, quorum angustum, intusque profunde striatum capitulum desinit in petiolum longum, acutum, plus minusve incurvatum: reperti in insula Gothlandiæ montibus calcariis, ubi maxima in copia eruuntur, & ob similitudinem, quam cum cornu arietino habent, (petrificerade Gums-horn) cornua arietis lapidefacta audiunt.*

Horum fungitarum primam, quod sciam, mentionem fecit Cl. Olaus Wormius in Musei sui Lib. 1. Sect. 2. Cap. 12. verbis sequentibus: *Fungites*, ait, seu *Fungos imitantes lapides ex Gothlandia habeo, substantia lapidem Judaicum ferme æmulantur: quibusdam in locis massa cretacea & calcarea iisdem adhæret. Convexa parte striæ à centro ad circumferentiam excurrunt minus profunde, sed concava profundiores, & in modiolum terminantur rotundum,*
in diame-

in diametro vix digiti latitudinem habentem, colore ex albo in coeruleum tendunt, verum pediculos non habent. (tales scilicet, quales in fungis terrestribus observantur, & quibus capitula rotunda insident). Ex crustis componuntur pluribus, unus lapis alteri inseritur, & difficulter separantur: duritie respondent lapide Judaico, adeo ut existimentur in eisdem, usus transferri posse, cum discrepantia non nisi figura existat. Hæc descriptio cum concinna sit & veritati consona, pauca nunc tantum ad maiorem illustrationem addam, quæ in diversis horum fungitarum speciminibus observavi. Ad substantiam igitur eorundem quod attinet, hæc plerumque calcarea est, & admodum dura, rarissime selenitica, vel lapidi Judaico similis, quam a primo initio (quemadmodum coralliorum marinorum omnium materia) mollem fuisse & fluidam, varia, quæ obtineo, fungitarum horum specimina, plana, compressa, varieque à vi externa deformata, abunde ostendunt. Structuram eorundem internam si consideramus hæc porosa, spongiosa est atque striata, illi haud absimilis, quam illustris *Columna* in dissert. de Glossopetris p. 33. fungo suo lapideo coralloidei attribuit, cum quo etiam figurâ externâ proxime convenire videntur nostri, nisi quod petiolus in plenisque sit acutior, magisque incurvetur. Unde magnam quoque affinitatem habere videntur cum illa lapidis corallini specie, quam *Columnelli* nomine proposuit *Luidius* in Lithogr. sua Anglicana. Capitulo autem gaudent omnes hi nostræ fungitæ, angusto, exterius radiato, interius profunde striato, striis a profundiori centro ad marginem, sive ambitum elatiorem excurrentibus, rotundo in plerisque, in quibusdam quadrato vel rhomboidali. Capitulum hocce sensim angustatum desinit tandem in pediculum itidem radiatum, plerumque brevem & obtusum, interdum longum, valdeque incurvatum, rarissime rectum & acu-

& acuminatum. Magnitudo incurvatorum fungitarum diversa est & varia. Maximi etenim ad cornu arietini: breviores ad agnini: & minimi ad agnelli recens nati cornu longitudinem accedunt. Fungitam mediæ magnitudinis, sed longo incurvatoque petiolo dotatum, figura hic apposita exhibet. Exterior eorundem superficies plerumque lævis, quandoque striata & cre-
 nis annulisq; distin-



cta, rarissime tuberosa, vel spinis armata. Omnes hæc differentias in variis fungitarum speciminibus ostendere possum, quæ vel ipse in insula Carolina collegi, vel provinciæ Gothlandicæ Medicus Experientissimus D. *Johannes Pihl* mihi ex Gothlandia transmisit, ubi multi solitarii, & à matrice liberati, plures poro, lapidique corallino adnati, vel calcario communi immersi intra montes calcarios & ad maris litora, colliguntur. Quod ad eorundem à *Wormio* memoratam virtutem medicam attinet, cum hæc dubia adhuc sit, & a saxi calcarii communis usu parum differat, de ea nihil quod addam, habeo.


7. *Fungites mediæ magnitudinis subrotundus, lævis, Gothlandicus, cujus pileoli orificium rotundum, & profunde striatum, pediculus autem valde brevis.*



De hoc verbo tantum monere debeo, quod ille lævitatem hanc suam, & ovalem formam, quâ pileolum nauticum exacte repræsentat, non naturæ, sed artificis manui debeat,

8. *Fun-*

8. *Fungitæ*, mediæ magnitudinis, tetragoni Gothlandici, quorum pileoli orificium vel quadratum, vid. Fig. a, vel rhomboidale, Fig. b. pediculus autem brevis & exiguus existit.



9. *Fungitarum minimorum pediculo destitutorum capitula parva striata ac trochiscorum instar crenata, collecta in litore maris Gothlandiæ.*

Fungitæ talis utrumque latus ex adverso depictum sistitur, ubi literæ *a*, *b*, *c*, *d*, *e*, & *f*, partem eorundem superiorem indicant. Lit. *g* autem & *h* inferiorem, in qua pediculi detriti superstes adhucdum vestigium distincte discernitur.



E

Lapil

Lapillos tales tenues crenatos, & circulares, *Calceolarius* in Museo suo p. 328. Numismales, a similitudine cum numis, vocavit. *Luidius* autem similes in *Anglia* repertos loc. cit. N.º 151. porpitæ minoris nummularis titulo proposuit. *Scheuchzerus* tandem l. c. Fig. 43. & 44. tales in *Helvetia* natos, lentes lapideas appellavit striatas, utrinque convexas, vitreis figurâ similes, cum *Luidio* anxius & dubius unde originem traxerint, & ad quoddam fossilium genus reduci debeant. Rem acu tetigisse videtur Cl. *Büttnerus* in dissert. de Coralliis fossilibus p. 24. dum similem ibidem Tab. III. Fig. 5. depictum lapillum, fungi cujusdam marini superiorem partem seu capitulum rectissime nuncupavit. Sive enim nostrorum lapillorum partem superiorem, *a, b, c, d, e, & f*, in modum fungitarum crenatam & rotundam; sive inferiorem *g & h* petioli vestigium adhuc ostendentem, examinaveris, utraque cum fungitis minimis convenit, quamvis in postica parte petiolus quandoque adeo ab aquarum fluctibus detritus sit & exesus, ut dignosci vix possit. Idem hoc locus eorundem natalis suadere videtur, quippe qui cum reliquis fungitis idem est ac communis.

10. *Saxum calcarium Gothlandicum proxime memoratorum, fungitarum exiguis capitulis, aliisque petrificatis marinis gravidum.*

Effigies



Effigies ejusdem hic pingitur. In aliis autem speciminibus, quæ possideo, fungitæ similes majores simul & minores commixti cum pectinitis cernuntur. De hoc omnique lapide tali fungifero iterum monere debeo, quod, si ejusmodi lapides à fluctibus marinis alluantur, adeoque poliantur, ut nihil præter um-

bratiles stellares figuras in superficie ostendant, hinc novum Lithographis astroitæ genus suppeditant vorticale, solare & cometiforme vocatum, radiis solaribus, stellaribus, cometiformibus coruscans. De quibus consulatur Cl. *Wolkmanni Siles. subterr. Tab. XVIII. Fig. 3. 4. 5. 11. 12. & Tab. XX. Fig. 1. & 2.* Quæ nova tamen astroitæ species, nihil aliud est quam capitulorum modo memoratorum densa strages & congeries lapidi immersa, quemadmodum in variis à me servatis speciminibus demonstrare possum.

ARTICULUS TERTIUS,

De Fungitis.


§. II.

- II. **F**ungites Gothlandicus magnus, pileolo amplo, lato, admodumque expanso, sed pediculo brevi donatus. E 2 Ele-



Elegans hæc fungitæ species forma sua ac figura adcurate convenire videtur cum fungita Helvetico ejusdem nominis, quem Celeberr. *Langius* in Hist. Lap. Fig. Helvet. p. 52. Tab. XII. depictum exposuit.

12. *Fungites major orbicularis Gothlandicus*, facie sua ac figura proxime accedens ad fungitam orbicularem Helveticum ejusdem *Langii* loco citato Tab. XI. descriptum.



13. *Fungites elegans major*, oris profunde crenatis, intusq; reflexis, ex Gothlandia.

Hic itidem ab ejusdem nominis fungita Helvetico Langiano Tab. XI. haud multum abludit, nisi quod pede destitutus margines densiores, magisque crenatos & ex meris lamellis concretos habeat.

14. *Fungites major orbicularis*, amplo pileoli orificio, cujus crenati & tenues margines præter morem valde exstant, & circa centrum in altum elevantur.

15. *Fungites Gothlandicus*, maximus circumferentia sua 14. pollices capiens, ex meris lamellis tenuioribus ac striatis compositus. In cujus protuberante capitulo, cavitas adeo coarctatur, ut digiti minimi apicem vix admittat.

16. *Fungites mediae magnitudinis candidus*, ac elegans, levioribus quidem, ast nitidissimis striis, a centro profundiori ad marginem elatiorem, amplum ac reflexum, procurrentibus, brevique petiolo conspicuus.



Ejusdem generis ac elegantiae fungitam lapidi calcario cinereo immersum, inter fragmenta saxi Gothlandici etiam reperit & depictum dedit, studiorum quondam & itineris socius suavissimus nunc b. m. J. F. Leopold in itinere suo Svecico p. 106. Tab. VII. F. 2. quam consule. Ceterum hi omnes memorati fungitæ majores, Gothlandiæ calcarios montes vel litora pro patria agnoscentes, substantiæ sunt calcariæ durissimæ, & coloris albidii, vel obscure cinerei; in parte eorundem exteriori, striæ leves, per totam superficiem excurrentes observantur, in interiori profundiores & quasi crenatæ, a centro ad peripheriam producuntur,

E 3


quæ

quæ in nonnullis speciminibus situm adhuc & dispositionem lamellarum intermediarum, e quibus fungi conflari solent, luculenter ostendunt. Magnitudine iidem, uti icones testantur, differunt, omnesque, majores imprimis, pediculo suo sed breviori instructi sunt, quamvis frequenter etiam sine eodem occurrant.

17. *Fungites Gothlandicus major parvo pediculo, cujus pileoli orificium lapide calcario communi infarctum & repletum.*


Quod horum fungitarum orificia interna non semper vacua sint & cava, sed peregrina quadam materia interdum oppleantur, hic cum sequentibus nonnullis testatum facit, cujus tota pars interior cava, saxo calcario referta & oppleta visitur.

18. *Fungites Gothlandicus major, longo & incurvato pediculo, cujus pileoli orificium stalactite infarctum est.*



19. *Fungites alius Gothlandicus brevi pediculo, & magno latoque pileolo conspicuus, cujus orificium sive cavitas, madrepora placentiformi sive eschara marina tenui reticulari obtegitur.*

20. *Fungites Gothlandicus bre-
vi pediculo & magno am-
ploque pileolo, cujus super-
ficies tota figuris astrifor-
mibus subtilissimis, & pro-
pemodum oblitteratis obdu-
citur.*



Lapidea hæc infarctura & astralis expletio novam iterum astroitæ speciem constituit, cujus centra scilicet minora & radii majores sunt. Figurâ autem lapis hic adpictus convenire videtur cum Cl. *Helwingii* corallio albido figuris astriformibus propemodum oblitteratis notato, in lib. citato Tab. V. F. 23. & p. 53. descripto: quam stellarum extersionem ego, cum E-ruditissimo Auctore, aquarum fluctibus adscribo.

§. III.

21. *Fungitæ octo majores, candidi pyxidati, quorum pediculi in imo coaliti, ex uno quasi pede ac principio exsurgere videntur.*

Inter omnes quas hætenus fungitarum species vidi, hæc Gothlandica à latere depicta luxurians, pro rarissima & pulcherrima haberi debet.



Quip-

Quippe quæ ex octo arctissimè coalitis fungitis, quorum quisque proprio suo gaudent capitulo sphærico cyathiformi, crenato, uti ex icone liquet, nec non pediculo singulari acuminato constat. Ut in basi coeuntes octo minores unum quasi majorem luxuriantem, & ex minoribus collectum fungitam repræsentent. Fungos hujus faciei terrestres, concretos & calyciformes, sed longe minores & seminiferos, depictos vide apud *Losselium* in *Flora prussica* p. 98.

22. *Ejusdem generis tertius luxurians & prolifer fungites Gothlandicus*, ex octo minoribus infundibuliformibus concretus, qui à proxime memorato non nisi colore & magnitudine discrepant.

23. *Ejusdem generis tertius luxurians*, ex septem minoribus calyciformibus compositus, qui hoc à ceteris differunt, quod centralis capitulorum cavitas plana conspiciatur, totaque materia calcarea infarcta.

24. *Ejusdem generis quartus*, ex quatuor tantum minoribus cyathiformibus fungitis constans, quorum singula capitula, profundam in centro cavitatem, & in ambitu duplicem quasi admodumque elatum marginem ostendunt.

Curiosa hæc fungitarum congeries, cum illo columellorum concreto, figura convenire videtur, quod *Wolkmannus* l. c. Tab. XIX. F. 3. depictum sistit: nisi quod columellorum margo in nostro crenatus, in Wolkmanniano lævis. Si autem figuram singulorum horum fungitarum, ex quibus totus componitur, examinemus, convenit hæc eadem omnino cum ista fungitæ specie, quam *Luidius* l. c. columelli ficoidis nomine; *Scheuchzerus* autem in *Lithogr. Helvet.* Fig. 20. 21, & 22. *alcionii tuberosi ficoidis* titulo proposuit.

25. *Lapis*

25. *Lapis calcarius grisei coloris, multis minoribus ac majoribus fungitis pyxidatis inter se coalitis gravidus. Ex Gothlandia.*

Lapis hicce, magnitudinem si exceperis, exacte convenit cum massa illa lapidea Gothlandica fungitis gravida, quam Cl. *Leopold* in itinere memorato Svecico Tab. VIII. p. 107. Coralloidis fistulosi titulo descripsit.

26. *Porpitarum plurium monstrosa congeries Luidii, sive fungitarum minimorum pediculis destitutorum elegans concretio, ex duodecim exiguorum fungitarum capitulis crenatis & radiatis constans, quæ superficie sua stellari astroitæ iterum novam speciem fingit, ex insula Gothlandiæ Carolina.*

Concretum hocce lapideum stellari ac astriformi sua figura, ultimam astroitæ vegetabilis speciem absolvit, radiis scilicet stellarum majoribus & centro depresso ac concavo conspicuam, proxime accedentem ad Cometitam *Scheuchzeri* N. 54. l. c. vel ad ejusdem astroitam majoribus stellis, ibidem N. 49. & 52. delineatos: quæ tamen astroitæ species, ceterique omnes magnifico hoc astrali titulo superbientes, lapides vegetabiles, reipsa nihil sunt nisi minimorum fungitarum, pediculis privatorum coagulum lapideum, quemadmodum ex iconibus hic additis facile colligitur, ubi N. 1. fungitam parvum brevissimo pediculo sistit. N. 2. possicam ejusmodi fungitæ partem, in qua pediculi vestigium adhuc superstes cernitur. N. 3. fungitam minorem longo & recto pediculo. N. 4. binos ejusdem generis coalitos N. 5. autem duodecim concretos fungitas minores exhibet. Adest itidem alius elegantior, ex sex exiguis capitulis pyxidatis, in unum pediculum

F

desi-

desinentibus, quem tamen iconis ob defectum omittere nunc debeo.



§. IV.

27. *Fungites magnus prolifer ac triplicatus Gothlandicus*, cujus tria vel plura capitula cyatiformia imbricatum alterum alteri innatum, ex uno eodemque pede exsurgunt.

Proliferi hujus fungitæ iconem vide Tab. Fig. 3. p. 411.

28. *Boletos communes figura sua referentes lapides Coralloidei*, reperti in Gothlandiæ litore marino.

Veros boletos terrestres figura sua adeo eleganter imitantur hi lapides, ut tales antea fuisse facile quis mecum crederet. Pediculo enim exiguo cavo ac tubuloso, capitulum in metam seu mucronem fastigiatum, non

non quidem cancellatum & fenestratum, sed striatum ac sulcatum, insidet. Quod si tamen rem fatear, uti eandem concipio, pro fungitæ illa specie haberi debent hi lapides, cujus capitulum supremum parvum, alteri latiori & pedato innascitur, tali fere modo, ac in proxime memorato & triplicato fungita cernitur; a quo tamen brevitatem & figuram boletiformi abscedit.

29. *Fungites Gothlandicus major, amplo latoque & per medium dissecto capitulo, cujus magnitudo, color, superficies lutescens, atque ex basi protuberans brevis pediculus, rapam communem per medium divisam, tam exacte fingit, ut peritissimum fallere possit.*

30. *Fungitæ Gothlandicæ alia species, asperitate sua rugosa, item & annulari figura, totaque facie, rapam exiguam assatam apprime referens.*

Hæc una cum priori ad fungitarum jam memoratum genus referri debet.

Atque hæc præcipua fuerunt telluris nostræ hæcenus detecta lithophyta, quorum maxima pars quamvis colore, substantia, figura, totaq; indole cum illis lapidibus fossilibus corallinis Anglicanis, Helveticis & Germanicis convenire videatur, quos Cl. *Luidius*, *Scheuchzerus*, *Langius*, *Helwing*, *Wolkmannus*, *Büttner*, aliiq; jam antea descripserunt; existant tamen inter eosdem multa specimina, quæ ab iisdem quam maxime discrepant, & digna videntur, ut nitidioribus iconibus illustrarentur. Nos ad secundam speciminis hujus sectionem properamus, quæ animalia nostra petrificata, illorumque partes varias fossiles ac lapidefactas comprehendet.

ARTICULUS PRIMUS.

De lapidibus insectiferis Scanicis & Gothicis.

§. I.

VEgetabilia subterranea sequuntur Animalium partes variæ fossiles ac lapidefactæ: inter has lapides nostri insectiferi primum locum sibi vindicant. Mollia insecta duro ac diaphano succino inclusa miratus quondam lepidus *Martialis*, qui in Epigramm. Lib. IV. & VI. viperam formicamque electro sepultam, elegantissimo epitaphio celebravit. Majori sane admiratione dignum est, insectorum spolia, ipsosque vermes videre, durissima inter saxa, labentesque montium ruinas, sepultos. Vivos vermes in ipso lapide nidulantes, saxumque commune comedentes, memoravit *Moufettus*, *Bonannius* aliique: lapides autem apum, scarabæorum, vermiumque exuviis gravidos meminit *Lippus*, *Richardsonius*, & nuperime Cl. *Beringer* in Tractatu quodam de *insectis petrificatis Wurtzburgensibus*. Nos non nisi de indigenis solliciti, missis exterorum exemplis ad domestica pergitur. Ad lapides igitur insectiferos Svecanos pertinent:

1. *Lapides fissiles nigri aluminares insectorum vestigia & figuras varias exhibentes, collecti in celebratissima lapicidina aluminaria Andrarumensi in Scania.*
2. *Ejusdem generis lapides alii nigri, in quibus insectorum borum vestigia, tenui mica aurea & argentea obducta, auri atque argenti colore eleganter coruscant. Ex eadem lapicidina Scanica aluminaria.*


In fodinæ hujus scilicet parte septentrionali, & quidem cuniculo in ordine sexto ac septimo, lapis hicce insectis foetus effoditur, scissilis, niger, aluminosus, & qui-


& quidem ejusdem plane generis ac reliqua minera aluminis, quæ ibidem effoditur, nisi quod hæc eadem pyritæ communis scintillis ac particulis magis abundet. Insecta autem in hoc lapide conspicua, quemadmodum ipsa aluminis minera, qua ceu matrice continentur, plerumque nigricant, pulvisculo levi griseo conspersa, quandoque tamen tenui flavi vel albicantis pyritæ foliolo obducta, aureo quasi vel argenteo fulgore eleganter micant. Facies eorundem diversa est, sed ubique tam peregrina & obscura, ut nemo nisi Oedipus nomen divinare, vel genus, quo pertineant, præcise definire possit. Quamvis enim quædam, si conjecturæ locus, ad pedata non alata, & quidem insectorum illam speciem accedere videantur, quæ multis pedibus incedit; reliqua autem vaginipennia, alas suas vaginis condentia, utcunque referant, conjectura tamen est, nec satis constat, ad quod insectorum genus, præcise referri debeant. *Jacobus Ludenius Westrogothiæ* quondam Medicus provincialis celeberrimus in *Exercit. sua de Lithogenesia Macro & microcosm. part. prior. §. 8.* Hæc eadem cum Lumbricis terrestribus & scarabæis comparavit, dicens: *Idem, etiam in petrificatis insectis, Lumbricis terrestribus, scarabæis, aliisque in minera aluminis in Scania reperiundis, observatur, ubi scarabæi petrificati ex scissili illo lapide eruti, cum vivis quoad omnia lineamenta conveniunt, nec vel exercitata artificis manu melius effingi possunt, nec ulli dubium relinqvunt, quin veræ scarabæorum reliquiæ sint.* Verum ut rem ipsam fatear, lubens confiteor me in illis schisti hujus aluminosæ speciminibus, quæ hætenus vidi, quæque à fodinæ illius, totiusque *Scaniæ* quondam Magistro metallico, illustri *Gripenhielmio*, obtinui, exactam hanc lumbricorum & scarabæorum similitudinem non deprehendisse, sed confusas tantum vermiculorum multipedum imagines, & vaginipennium animalculorum impressiones ta-

F 3

les,

les, quales heic in Iconibus infra additis manu artificis exprimuntur: ubi *a* & *b* bini lapides similes aluminosi nigri fissiles diffracti & divisi sistuntur, ut L. B. videat, quomodo insecta hæc inter ipsa schisti strata delitescant, ita figurata quemadmodum ibidem depinguntur. Ad lit. *c* autem ejusdem generis lapis exhibetur alius, in quo insectorum imagines & vestigia, aureo vel argenteo colore fulgent.





§. II.

MAjorem cum vermiculis vaginipennibus crustatis & scarabæis similitudinem habere videntur insectorum illæ exuviæ lapideæ, quas saxo fœtido immerfas, in Westrogothia primus collegit, mecumque communicavit provinciæ Scaraborgensis tunc, nunc Nericensis Medicus celeberrimus, D. D. *Jobannes Hesselius*. Saxum scilicet hocce insectiferum in *Westrogothiæ* parœcia *Karabylonga*, *Dala*, aliisque haud procul ab antiqua urbe *Skara* locis effoditur, & Calcarii genus est fissile, albidum vel fuscum, gravem, si ferro teratur, fœtorem spirans, unde fœtidi nomen contraxit suilli, nostratibus autem *Orsteen*, quoniam morbo suibus familiari *oran* vocato, medetur, de quo in specimine sequenti agendum erit. Inter crustosas scissilesque saxi hujus fœtidi tabulas, insecta memorata protuberant & exsurgunt, substantia sua, colore ac fœtore cum lapide, cui inhærent, convenientia, sed specie, figura ac magnitudine inter se distincta. Præter umbratiles etenim papilionum vel muscarum quasdam imagines, lapidi huic leviter sed distincte impressas, multa scarabæorum figuras, mole totaque facie imitantur; longe plura autem aliud quoddam exiguum & crustatum ignoti vermiculi genus referunt, quemadmodum ex iconibus sequentibus percipiet benevolus lector; veniam, facile daturus artifici quod has naturæ delicias & subtilissimas vermiculorum effigies, in ligno minus accurate exprimere potuerit.

3. *Scarabæorum vel aliorum vaginipennium animalculorum vestigia, Lapidis scissili fusco ac fœtido impressa. Ex Westrogothiæ parœcia Karabylonga, ubi fœcundissima lapidis hujus messis colligitur. Forma & effigies horum animalculorum in addita icone conspicitur.*

4. *Lapis*



4. Lapis fissilis subalbidus vel fuscus in superficie & interstrata sua, minimorum vermiculorum vaginipennium & crustatorum imagines innumeras exhibens, inventus intra ejusdem Karabylongæ lapicidinam quandam calcariam in Westrogothia. Ignoti hujus animalculi strages lapidi ceu matrici immersa a latere depicta cernitur.

G

5. Ejus-



5. Ejusdem generis lapides insectiferi, circa cœnobium Westrogothiæ celebratissimum Warnhemense collecti. Hi figura cum proxime memoratis conveniunt, nec nisi natali loco differunt.

6. Saxum

6. *Saxum fœtidum nigrum spoliis insectorum majorum vaginipennium refertum. Ex eadem lapicidina in Karaby-longa. Quantum mole ac magnitudine proxime recensita superent hæc in ejusdem generis lapide conspicua animalcula, ex addita imagine colligi potest.*



7. *Ejusdem generis ac magnitudinis insecta crustata, lapidi calcario candido communi & inodoro immersa. Ex Westrogothiæ parœcia Dabla.*
8. *Vermiculorum aliud singulare; & quasi alatum genus lapidi fœtido griseo, nec non fusco innatum. Ex iisdem locis in Westrogothia. Ob iconis defectum, ignotum, hocce animalculum rite describi nequit; figura tamen & specie magnam affinitatem habere videtur cum vagini pennibus illis alatis insectis, quæ in schisto aluminari Andrarumensi conspicua, superius No. 1. delineantur.*
9. *Papilionum majorum ac minorum imagines, & impressiones nitide, in lapide calcario communi inodoro, uti etiam in alio fœtido conspicuæ, ex iisdem Westrogothiæ locis.*
10. In-

10. *Insectorum ovula, an Nymphæ seu Aureliæ lapideæ? saxo fætido nigricanti immersa. Ex eadem parœcia Karabylonga.*

11. *Lapis fissilis niger vermiculi corpusculum rugosum exhibens in superficie. Ex monte Dahlenſi in parœcia Dabla.*

Atque hæc præcipua sunt lapidis hujus insectiferi Westrogothici specimina, quæ hucusque obtinere potui, de quorum loco natali elegantissimam relationem cum idem laudatissimus D. D. *Hesselius* transmiserit, non possum quin eandem cum Lectore benevolo heic communicem. In Westrogothiæ, ait, parœcia Karabylonga, quarto ab antiqua urbe Scara, lapide, prope viam regiam, in valle quadam profundiori, lapicidina ex lapide calcario & fissili nigro constans, conspicitur, cujus strata ex tenuioribus & crassioribus tabulis concreta, totum campum occupant, ab utroque latere, parietum ad instar protuberantia. Superior terraque proxima crusta ex tabulis calcariis dilute griseis composita, lapidi calcario Oelandico haud dissimilis videtur, inter strata sua quemadmodum ille multos dactylos lapideos, sive alveolos variæ magnitudinis, occultans. Ex saxo hocce calcario rudi Westrogothi templa sua & cippos sepulchrales exstruere solent, ex eodem autem cremato calcem optimam præparant. Sub strato hocce calcario griseo, alius hujus elegans niger ac fissilis lapis situm habet, cujus lamellæ quo profundius tendunt, eo crassiores & solidiores evadunt, perutiles tunc & aptæ ad tabulas menſarias & scriptorias inde conficiendas. Inter nigerrimi lapidis hujus strata juxta lapicidinæ parietes, venæ hinc inde excurrunt lapide suillo fætido gravide, qui lapis colore variat, & plerumque in chryſtalliformes figuras excrescit. Fætidi hujus lapidis matrix in fundo lapicidinæ hinc inde dispersa, vel ipsi

ipsi morti adnata, fœtore suo cum fœtido fœtu suo, quo imprægnatur, convenit, sed more lapidum fissilium in tenues lamellas facile finditur, innumera insecta superius descripta lapidea diversæ figuræ, typi ac magnitudinis undique inter strata sua fovens. Inter easdem tabulas fissiles præterea inprimis prope lapidicinæ fundum; ubi densiores evadunt, globuli visuntur lapidei nigricantes plani vel spherici, sed adeo affabre concinnati, ut intra modiolum exactius formari non possint, qui a matrice sua divulsi vestigium relinquunt illi simillimum, quod in cera molliori a corpore duro exprimitur. Ex ipsis lapidicinæ hujus parietibus pulvis albicans exsudat, qui quemadmodum ipse lapis fissilis, cui adherere solet, sub dio & in apertis locis insipidus est, sed in occultis, ubi aeri aditus non patet, manifestum aluminis saporem habet. Ex stratorum fissuris denique aqua quædam limpida, ochram subtilem ruffam vebens, quæ super lapides præcipitata & exsiccata, eosdem colore inficit luteo, illique simillimo, quem *Schiltgelb* appellare solemus. Hactenus Vir clarissimus, cujus promissam Historiam *Westrogothiæ* naturalem anxie expectamus.

§. III.

Recensitis binis hisce lapidis insectiferi generibus tertium addere nunc debeo, dudum & diu antequam *Westrogothicus* ille innotuerat, a me in *Ostrogothia* repertum. Scilicet cum anno 1715 valetudinis gratia ad acidulas *Ostrogothiæ* celebratissimas *Medwicenses* iter instituerem, inter *Ostrogothiæ* oppida *Schenningam* & *Lincopiam* in parœcia *Giärstad*, haud procul a templo *Ullevien*si, collem arenarium animadverto, vario saxorum genere, inprimis fœtido illo seu *Suillo* abundantem, ejus fragmenta ultro citroque dispersa dum colligo, malleoque divido, inter saxi tabulas fissiles, insignem exiguo-

rum animalculorum lapideorum stragem dispersam & lapidi impressam, deprehendo. Ipse lapis quo animalcula hæc continebantur, substantia, colore, fœtore totoque genio cum proxime memorato saxo insectifero Westrogothico plane convenit; insecta etiam in eodem conspicua, forma, figura totaque sua facie illis insectis simillima sunt, quæ in saxo Westrogothico conspiciuntur, adeo ut mirari satis nequeam, quomodo tot ejusdem speciei insecta ad tam diversos adeoque inter se distinctos *Gothia* locos pervenire potuerint. Similitudinem hanc utriusque lapidis insectiferi ut melius dignoscat Lector benevolus, ipsa specimina Ostrogothica, quæ tunc collegi, heic enumerabo.

12. *Lapis fissilis fœtidus, fuscus, innumeris exiguis animalculorum crustatorum figuris undique refertus. Ex arenariis in Ostrogothia paræcia memorata Giärstad. Animalcula hæcce mole, figura testudinacea, totaque specie exacte conveniunt cum ignotis illis vermiculis Westrogothicis, quorum superius in præcedenti paragrapho ad Num. 4. mentionem fecimus.*
13. *Insectorum majorum vaginipennium & quasi alatorum spolia lapidea in saxo fœtido conspicua, ex eodem loco. Hæc iterum figura ac specie magnam affinitatem habere videntur cum insectis illis alatis Westrogothicis, quæ superius ad Num. 8. memoravimus.*
14. *Papilionum minorum imagines & impressiones, in ejusdem generis saxo suillo fœtido. Ex eodem loco. Hæc itidem figura sua a papilionibus illis differre haud videntur, quarum superius Num. 9. meminimus.*

Plures insectorum species in lapide hocce Ostrogothico non observavi; præter quas, cum in eodem sabuleto plurimos simul conchitas majores & exiguos
spectun-

pectunculitas, inferius recensendos, saxo ejusdem indolis immerfos invenerim, dubitare cœpi, utrum propiæ terrestris essent ignota hæcce animalcula, & annon pelago potius quam telluri originem suam debeant. In hac opinione me non parum confirmabant superius memorata lapidum insectiferorum specimina, Scanica, & imprimis Westrogothica, quæ conchitas & pectunculitas similes semper quoque comites habuerunt, haud obscuro indicio, quod tota hæc supellex lapidea vermicularis, haud minus ac testacea, pelagi quondam, foetus fuerit, qui in fundo maris natus, & ab diluvianis undis in telluris gremium translatus, ibidem tractu temporis ab effluviis calcariis in substantiam lapideam mutatus sit.

15. *Lapis fissilis fuscus & fœtidus, ejusdem generis insecta continens, quæ superius No. 1. 8. 13. descripta sunt, inventus in lapicidina quadam saxo fissili ac fœtido divite, in Nericiæ parœcia Knista.* Animalcula hæcce iterum, nec facie nec figura a superius memoratis insectis lapideis Ostro- & Westrogothicis differant, præterquam loco natali. Is etenim mediterraneus est, & multis miliaribus a parœciis *Giärstad* & *Karabylonga* remotus.

Lapis aluminaris niger, scissilis, Scarabæorum majorum, nitidissimis imaginibus ac vestigiis gravidus. Ex fodina aluminaria prope Olstorp, in Westrogothiæ parœcia Aklinge, ubi illustr. General. Mentzer officinam aluminariam, æuper instituit. Inter omnes, quas hucusque vidi lapidis insectiferi species, hæc elegantissima est & nitidissima, quippe quæ scarabæorum majorum, aquaticorum, vel similium insectorum vaginipennium grandiorum figuras & impressiones adeo nitide ac dilucide exprimit, ut penicillo adcuratius vix depingi possint.

sint. Figurâ externâ conveniunt inter se hæc animalcula, haud secus ac colore griseo, quo, tenui quasi tegmine teguntur; sed magnitudine differunt. Quamvis enim pleraque corporis mole scarabæos communes vix superent, nonnulla tamen ad aquatici majoris, vel cornuti ac nasi cornis scarabæi magnitudinem ascendunt. Ipsa matrix, cui insectorum hæc imagines & vestigia inhærent, lapis est niger fissilis aluminaris, optimum alumen suppeditans, qui uno duntaxat fodinæ hujus in loco ad 6 vel 8 orgyærum profunditatem sub tellure effrangitur, quemadmodum in literis mihi missis testatur lapidis hujus inventor celeberrimus, D. D. *Hesselius*, cujus benevolentia specimina hæcce Westrogothica debeo.

Lapis calcarius fætidus fusci coloris, inter innumeras insectorum minimorum figuras, conchitam alatum, anomicum, elegantem exhibens. Ex eadem Fodina aluminaria ibidem. Insecta hæc quemadmodum ipsa matrix cui adnascuntur, figurâ sua ac specie conveniunt cum antea memoratis exiguis animalculis Gothicis: sed concha inter eadem protuberans adeo singularis & peregrina est, ut quo eandem præcise referam, admodum ignorem.

ARTICULUS SECUNDUS.

De

Tubulitis Vermicularibus.

§. I.

Tubulites vocatur lapis teres, tubulosus, figura sua referens testaceum quoddam marinum, fistulæ modo

do cavum, & convolutum, in quo vermis delitescit, unde etiam tubulus vermicularis appellari solet. Hujus generis varii lapides apud exteros reperiuntur; sed apud nos quamvis ejusmodi tubuli conchis cochleisque adnati sæpissime in oceano circa urbem *Gothoburgum* & *Udwallam* conspiciantur, intra tellurem tamen adeo pauci hactenus detecti sunt, ut distinctum articulum vix mereri videantur. Cum tamen a reliquis quibuscunque petrificatis toto genere discrepent, non potui quin proprium iisdem locum assignarem. Hoc nomine igitur veniunt.

1. *Tubulitæ exigui vermiculares cinerei, fungitæ minoris capitulo radiato, adnati. Ex Insula Gothlandia.*
2. *Lapis calcaris grisei coloris, præter trochitas, & lapides figuratos ovatos exiguum tubulitæ in superficie exhibens, inventus in territorio Fersorum Scanico, prope villam Biersöds ladugård vocatam.*
3. *Argilla cinerea Siliceæ duritiæ, variis anfractibus & foraminibus pertusa, cui adnascuntur balanorum calices, striati candidi, & vermicini ductus varii, a Lithographis alcionium vermiculare, & tubuli vermiculares, vocati, inter canas sterilesque rupes in fundo oceani reperta, circa castellum Marstrand in Bahusia, ubi tam copiose invenitur, adeoque indies adcrescit, ut piscatorum retibus non leve damnum ac incommodum inferat. A nostratibus alcionium hocce ibidem bekkel, a lacu ejusdem nominis, appellatur, de quo plura qui desiderat, legat velim cl. Leopoldi iter Svecanum. p. 109 & illustris Hierneri besvärade och förklarade anlednings första fläck. p. 81.*

CAPUT SECUNDUM.

*Testacea fossilia lapidesque Conchiformes
continens.*

ARTICULUS PRIMUS.

DE

*Testaceis marinis variis, quæ integra & immutata
e tellure effodiuntur.*

§. I.

Quod Testaceorum nomine generali animalia veniant exsanguia marina, substantiam intus habentia carnosam, mollem, extus duram atque solidam, omnibus adeo notum est, ut explicatione non indigeat. Substantia hæc Testaceorum interna mollis ac carnosæ rarissime, si unquam in lapidem indurata cernitur, exterior autem & dura portio in universum Testa, nostratibus *Snäck- & Mussell-Skal* vocata, hæc eadem est, quæ vel integra & quoad substantiam immutata ex Tellure eruitur, vel intra terram lapidifacæta, & materia lapidosa infarcta, frequentissime deprehenditur. Huc etiam referri debent Concharum variæ farcturæ sive nuclei lapidei ad Conchæ formam ac modulum effecti, in quibus nullum quidem superest amplius testæ vestigium, sed figura tantum Conchiformis, quam soli Testæ, quæ olim continebantur, acceptam referunt. Testacea hæc fossilia utriusque generis quemadmodum ipsa marina dividuntur in univalvia & bivalvia. Hæc ex duobus plerumque contiguis corticibus Testaceis componuntur; illa ex unica contigua Testa constant. Ultraque classis cum rursus late admodum pateat, consultum singula

singula separatim & proprio suo ut tractentur loco. In antecessum autem & antequam Conchyliorum lapideorum historiam aggrediamur, necesse erit ut illa testacea præmittamus, quæ integra & quoad substantiam suam immutata ex Telluris nostræ gremio effodiuntur. Hujus generis sunt:

1. *Bolus purpurei coloris, levis, ad contactum lubricus, conchis exiguis, radicumque fibris refertus, erutus in parcie Österbaninge adjacente pago Oxnön, 3 $\frac{1}{2}$ miliar. ab Holmia.* Prolixam boli hujus conchiferi descriptionem transmisit b. m. illustris Gripenhielm, quæ cum a Doctissimo D. Leopoldo Lubecensi in *i inere Suecano* recensita sit, illa ibidem p. 69. legi potest.
2. *Pectunculi candidi, tenues admodumque fragiles striati, ante annos aliquot hic Holmiæ ad ulnarum aliquot profunditatem intra gremium montis arenosi Brunconis in suburbio boreali reperti.* Quod maris quondam alumni fuerint pectunculi hi fossiles, & inde per diluvium ad altissimi hujus collis viscera translati, svadet eorundem figura, substantia, fragilitas, totaque indoles testacea, qua cum pectunculis marinis adeo conveniunt, ut nullum plane discrimen intercedat, quemadmodum ex addita figura patet.



3. *Conchyliorum varia species fossiles, collectæ in collibus arenariis prope urbem Udwalliam in Bahusia.* Inter varias illas testarum species, quas ex collibus hisce obtinui,

tinui, eminent in primis sequentes:

1. *Buccinum albidum striatum, intra quinas spiras finitum.*
2. *Musculi communis testa fossilis tenuis cinerea minor.*
3. *Pectinis majoris profunde striati testa cinerea utrinque aurita.*
4. *Dactyli fossiles solitarii, altera seu pari valva destituti, magnitudine & tenuitate variantes.*
5. *Dactyli fossilis alia species major, oblonga & juxta longitudinem sulcata, cujus extrema pars retusa & quasi prærupta cernitur. Externa sua facie convenit hæc dactyli species cum concha illa marina, quam Histrius in lib. de Cochl. marin. Tab. v. N. 38. depictam sistit, nisi quod in hac nostra Udwallensi apophysis dentiformis desit.*
6. *Conchæ marine singularis quedam & nondum descripta species fossilis, extus gibbosa, & in protuberantiam elevata, intus septo transversali triangulari munita, quo testæ pars superior acuta ab inferiori lata ac crenata distinguitur. Ignota hæc conchæ species a ceteris omnibus multum discrepat; longitudine etenim sua ab articuli digitalis ad integri digiti longitudinem ascendens, extus convexa est, in dorsum gibbosum protuberans, intus cava crenata atque mediante septo memorato triangulari in duas quasi contignationes sive conca-merationes divisa. Qua singulari structura quamvis cum balanarum calicibus separatis & diffractis aliqualem affinitatem habeat, propius tamen ad solonis speciem accedere videtur. consule fig. I. ubi litera a) exteriorem ejusdem, b) autem interiorem partem indicat. Ad locum Conchiliorum horum omnium natalem quod attinet, tota hæc suppellex marina in arenariis collibus & tumulis circa urbem Udwalliam & in vicinis Bahusiæ insulis colligitur, ubi dimidia ulna sub vivo cespite densissima ex similibus conchy-*

conchyliis formata strata videntur, adeo densa ac duriter inter se compacta, ut ferro dividi ac divelli debeant. Reg. Coll. Metall. Assessor Nobiliss. D. *Svedenborg* in tractatu de *altitudine aquarum & maris in prius orbe vehementiori aestu*, conchiferorum horum collum mentionem fecit, asserens eosdem nonnullis in locis altitudine 50 orgyis superare oceanum, ultra 90 ulnas & amplius quandoque inde distitum. Substantiam horum conchyliorum si spectemus, calcaria hæc est candida & testacea, sed igne cremata & calcinata nigrescunt, quæ nigredo tamen perit, & in albedinem mutatur ubi aqua subacta in calcem fatiscunt. Modus quo incolæ ibidem ex conchyliis hisce optimam calcem conficiunt, a Celeberrimo Upsaliensium Professore D. *Laur. Robergio* in dissert. de *astaco fluviatili* p. 5. sect. I. describitur, quem consule.

§. II.

4. *Ochra conchifera lutea, conchyliorum varias species, variæque spolia marina continens collecta intra speluncam quandam calcariam desertam, fläske-grafven dictam prope urbem Christianstadt in Scaniae territorio Willandiano.* Conchifera hæc terra Ochra lutea quædam species est calcaria, tenera, admodumque friabilis, conchiliis, coralliis, belemnitis, radiolis aliisque spoliis marinis adeo onusta, ut microscopio examinata, tota fere ex iisdem composita videatur. Inter testacea innumera, quæ terræ huic ceu matri inhaerere solent, sequentia observavi:

1. *Testa ostreae marinae insignis, levis, ambitu octo pollices capiens.*
2. *Patellæ magnitudinis variæ, leves, tenues, ac oblongæ, figura sua patelliformi, ovali chame vel ostrea cujusdam mutila speciem præ se ferentes.*

H 3

3. Con

3. *Conchæ profunde striatæ, subrotunda, majores, quarum striæ a cardine ad imam oram usque extenduntur.*
4. *Conchæ minores subtilissime striatæ & a cardine ad oram magis elongatæ.*
5. *Musculi minores laeves.*

6. *Auris marinæ species quadam a communi differens.*

7. *Echinorum, belemnitarum & radiolorum varia specimina elegantissima, de quibus inferius in cap. tertio agemus.*

Substantia supellectilis hujus marinæ, calcaria est testacea & fragilis, qua haud minus ac colore, matrice & indole quam maxime convenit cum terra illa conchifera exotica Lousbergensi, quæ prope Aquisgranum colligitur, & a nobiliss. D. Swedenborg in misc. observ. part. I. p. 15. adcurate describitur. Ipsa spelunca, ubi hæc ochra conchifera effoditur, urbi Christianstad in Scania vicina est, & fossa lardi (*Fläske grafwen*) nuncupatur, quoniam intra eandem incolæ in bello danico lardum aliaque obsonia occultaverunt. Appellatur etiam specus montis Baldri, quoniam sub monte quodam Bald seu Baldursberg vocato, penetrat spelunca hæcce, de cujus structura interiori sequentem relationem transmisit D.D. Ferber loci ejus oculatus testis: haud procul, ait, ab urbe Christianstadt in Scania, prope prædium Robelöf & pagum Röbyensem, specus visitur insignis subterranea, cujus antrum cum ante annos aliquot meo jussu servus quidam intraret, observavit ille profunditatem cavernæ ad 100 orgyias circiter accedere. Ad profunditatem duarum orgyiarum postquam servus pervenerat, novum iterum tabulatum sive stratum subterraneum deprehendit, unde aditus ad alias plus quam 30 speluncas fornicatas patebat, quæ omnes e simili materia calcaria conchifera, albida vel sublutea constare videbantur. Totius specus hujus Calcarie facies interior fodinam antiquam cum cuniculis suis ac puteolis referebat, ad quorum adyta tamen nemo nunc ob aquam subterraneam, omnia inundantem, penetrare potest. Intra spelun-

speluncam hanc ejusque antra nullus vapor mineralis noxius, sed aer purus & respirationi amicus persentiebatur. Ulteriore rem cryptæ hujus conchiferæ descriptionem promisit, Historiæ naturalis scrutator indefessus, celeberrimus Professor Lundensis D. *Stobæus*, cui præcipua superius memorata conchyliorum specimina debeo. In Fig. 2. Frustulum Ochreæ hujus patellis, conchis, aliisque marinis gravidum exhibetur.

5. *Terra calcaria alba dura varitis conchyliorum speciebus nitidissimis grvida, collecta intra Lapidinam calcariam Egnabergensem in Scaniæ territorio Giöinge - härad.* Conchilia quæ intra Lapidinam hanc, non nisi quatuor milliaribus a proxime memorata specu montis *Baldri* distantem effodiuntur, quamvis cum Baldrianis recensitis magnam affinitatem habeant, differunt tamen ab iisdem sequentia:

1. *Patellæ exigua spherica subtilissime striatæ.*
2. *Conchæ minores laeves & candidæ.*
3. *Conchæ tenuiores planæ subtilissime striatæ.*
4. *Conchæ mediæ magnitudinis a cardine ad oram magis elongatæ, laeves ventre crassiore & ad imam oram sensim attenuato.*
5. *Conchæ minores striatæ & imbricatæ elegantissimæ.*
6. *Pectines variæ magnitudinis profunde sulcati.*
7. *Pectines striis rarioribus & elatioribus eleganter notati.* Horum specimen elegans matrici adhærens in fig. 3. sistitur.

Quemadmodum proxime memorata conchilia specus montis *Baldri* cum conchis fossilibus Aquisgranensibus conveniebant, ita hæc Egnabergensia, ratione soliditatis, substantiæ coloris ac matricis magnam similitudinem habent cum illis conchis subterraneis exoticis, quæ ante annos multos a me prope *Rhemas* in *Campania* inventæ sunt, & a sagacissimo D. *Schynvoet* Amstelodamensi in notis pereruditis ad *musæum Rumpii* p. 317. descriptæ, quarum species inferius in calce speciminis hujus recensentur.

§. III.

6. *Umbilici marini, an blattæ bysantine vel alius testacei univalvis fossilis nova & ignota species, reperta in litore lacus Iswö in Territorio Villandico, 2 milliar. ab urbe Christianstadt in Scania.* Quo titulo novum hocce & nondum descriptum testaceum salutare debeo, ignoreo, dubius adhucdum utrum ad umbilici cujusdam marini, blattæ vel patellæ genus pertineat. Cum cochleæ tamen marinæ peregrinæ operculo magnam affinitatem habere videtur. Quippe quod quemadmodum umbilicus marinus testa est tenuis plana candida & sphærica, magnitudine ac crassitie nummulum assem vix superans, in cujus parte anteriori, margine elatiore ac circulari dotata, facies Leonis vel alius animalis barbata cernitur. Bina scilicet in supremo foraminula, oculorum ad instar, testam perforantia, quibus hiatus seu rima transversalis, rictum animalis apprime referens substernitur, undique striis capillaceis, tot veluti capillis, cincta. Pars ejusdem postica parum extuberans blattarum in morem variis circulis minoribus excentricis exornatur, tali plane modo, quo in fig. 4. & 5. depingitur, ubi ad lit. a pars operculi antica ad b vero postica exprimitur. Colliguntur autem peregrini hujus testacei specimina in arena litorali lacus Iswö dicti, haud procul ab arce quadam antiqua *Brattingsborg* in Scania, ubi ob figuram numismalem ab incolis *Brattingsborgs-penningar* audiunt, & ab ignaris pro nummis in lapides mutatis venditantur, quemadmodum mihi retulit Caroli Coronæ Medicus laudatissimus *D. Roslinus*, qui prolixiorum eorundem historiam promisit.
7. *Ejusdem generis ac indolis alia minora specimina, lapidi calcario candido, ceu matrici adnata, ex lapicidina Egna-bergensi in Scania.* Hæc, magnitudinem si exceperis, cum
Bratting-

Brattingborgensibus conveniunt, cum antea memoratis conchiliis simul intra lapicidinam calcariam Egna-bergensem inventa.

8. *Balanorum Calices sive Testæ majores, conjunctim concreta & lapidi argillaceo adnata, effossæ ex tellure prope villam Smetofsta in Westrogothiæ parœcia Hierpus dicta. Rarissimi hujus concreti testacei anno 1727 bina duntaxat frustra, sub cortice præduro argillaceo ad 50 ulnarum profunditatem e tellure effossæ sunt, in Westrogothiæ illo loco ubi fontes salinos ante annos aliquot illustrissimus Baro & Regii metallici Præses dignissimus D. CONRAD RIBBING, detexit. Ipsi balani, ex quibus tota utriusque frustuli massa componitur, mole, substantia, figura, totaque facie conveniunt cum exoticis illis balanis marinis, quas Rumphius in Musæi Amboinici lib. 2. Tab. XLI. Lit. A depictos sistit, nisi quod cavitates in nostris Westrogothicis intermediæ, argilla cœrulescenti, adimpleantur, uti ex eorundem icone in Fig. 6 exhibita patet. Ad substantiam earundem quod spectat, testacea hæc est, testis balanorum exoticorum simillima, ita ut mirari liceat, quomodo, sine diluvii universalis præsumptione, animalculum marinum adeo peregrinum, nostroque oceano ignotum, ad Regionis Borealis loca mediterranea pervenerit.*

ARTICULUS SECUNDUS

De

Testaceis univalvibus lapideis tortuosis sive turbinatis, ad Cochlearum imaginem formatis.

§. I.

CONchylis fossilibus integris & non mutatis succedunt Testacea lapidea univalvia turbinata. Hæc quamvis

vis nostris in locis tanta in copia non colligantur, ut musea nostra onerent, nihilominus tamen tam speciosa & eximia apparent, ut elegantia sua eadem quam maxime ornent. Inter turbinata hæcce lapidea, quæ volutis sive helicibus gaudent, agmen ducit Cornu Ammonis, ita nuncupatum lapidis figurati genus, quod spiras in se convolutas & intortas habeat ad instar cornu Arietini, quo Jovem suum Ammonem armatum, Gentiles finxerunt. De qua traditione legatur *Thom. Bartholini* observat. de unicornu, *Joh. Reiskii* Exercit. de cornu Hammonis, & *J. J. Bayeri* Oryctographia Norica, ubi nominis hujus origo fuse explicatur. Antiquo Cornu hujus Ammonis nomini, novum substituerunt Lithographi recentiores synonymon Nautilitæ, quoniam inter cuncta Conchylia hæctenus nota, nullum existit, cujus figura propius ad cornu Ammonis accedat quam Nautilus, Conchæ univalvis species notissima. Nautilitarum horum varietas ac insignis diversitas videri potest apud memoratum *Bayerum*, *Listerum*, *Luidium*, *Langium* aliosque Lithographos percelebres, qui in libris antea citatis eorundem plurimas species enumeraverunt. Apud nos sequentia duntaxat Nautilitæ sive Cornu Ammonis specimina huc usque nota sunt:

1. *Nautilorum Nuclei lapidei leves & deformes, qui præter figuram externam cum veris nautilitis, nihil commune habent, inventi in Insula Gothlandiæ montibus calcariis.*



2. *Nautilites tenuis compressus umbilicatus discoides acio in ambitu prominula, & subtilissimis striis ubique nota*

tus-

tus, ex eadem insula. Integri tales Nautilitæ raro occurrunt. In plerisque etenim discus hicce, sive oram extimam ambiens acies tenuis, ab injuriis externis consumitur, unde aliam postmodum, & quidem talem, qualis a latere sistitur, figuram induunt, quæ cum Nautilita Anglicano Luidii ad N. 6 in Ichnographia Lithophyl. Brit. ejusdem depicto,



apprime convenit.

3. Cornu Ammonis frustulum profunde sulcatum, & in spina striatum, sine articulis, figura sua cornu arietinum referens, ac proinde a nonnullis Ceratoides vocatum. Ex Gothlandia. Vera lapidis hujus imago & ma-



gnitudo, heic exprimitur, parum differens a particula illa Ammonis lapidea, quam Boëtius de Boot in Hist. lap. cap. 246. Imperatus in Hist. nat. lib. XXIV. c. 26. & Scheuchzerus in Lithogr. Helvet. fig. 81. depictum exhibuerunt.

4. Cornu Ammonis magnitudinis insignis, leve; quatuor anfractuum sive spirarum, ex eadem Gothlandia. Quam-


vis nec spina nec articuli nautilitis exoticis adeo communes, in pereleganti hoc specimine Gothlandico appareant, cortes tamen tenuis, testaceus, striatus, eidem hinc inde adhæret, manifesto indicio nautili speciem fuisse rarissimam, & dignam sane, quæ icone illustraretur.

5. *Cornu Ammonis candidum triplici orbe seu convolutione spirali instructum, & lapidi calcario fusco immersum.*



Ex eadem insula. Nautilitæ hujus imago a latere visitur, ubi pars nigra matricem, candida autem cornu Ammonis matriçi innatum, indicat; utrumque autem lapidis hujus latus manu artificiosa positum est.

6. *Cornu Ammonis levis vestigium, saxo calcario griseo Gothlandico nitide ac profunde impressum. Ad quamnam Nautilitæ speciem hoc cornu Ammonis præcise referre debeam, definire nequeo, cum, teste icone laterali, vestigium ejusdem duntaxat in matrice calcaria conspiciatur.*



7. *Alius lapis calcarius Gothlandicus simile cornu Ammonis vestigium, sed profundius & nitidius expressum exhibent. Hic Nautilita a proxime memorato parum differt, nisi quod spirarum lineamenta a sculptore, perverso plane modo heic in icone laterali, exhibita, luculentius quam in priori distinguantur.*



8. *Matrix Cornu Ammonis e durissimo lapide subcinerei coloris constans, in qua insignis & juxta helices longitudinem striati Nautilitæ elegans impressio cernitur. Ex eadem Gothlandia. Ulteriore lapidis hujus elegantissimi descriptionem, ob defectum iconis in aliud tempus differre cogor.*
9. *Ad cornu Ammonis genus referre tandem etiam debeo rarum illum & insignem lapidem, serpentis sceleton referentem ex Scania, quem depictum verbis sequentibus descripsit Olaus Wormius in musei sui lib. I. sect. 2. cap. XII. Ex ordine, inquit, lapidum, qui figura serpentem in spiras convolutum referunt, insignem possidet D. Fabricius, cujus cum mihi particulam communicaverit, integrum hic delineare operæ duxi pretium. Grandis est, ambitu pedes ferme quatuor obtinens, in Diametro circumferentiæ pedem unum cum uncis quatuor. Planus in spiras convolutus, ita ut interior convolutio, quæ minima est, foramen in centro relinquat pollicis*

13. *Cochlitæ laeves umbilicati nigricantes, trium spirarum,*

saxo calcario durissimo nigro adherentes. Ex monte Westrogothiæ altissimo Billingen vocato.



14. *Saxum calcarium durissimum, fuscæ coloris, conchitam majorem elegantem, lævem ac umbilicatum quatuor spirarum continens. Ex eodem monte Billingen in Westrogothia.*



15. *Cochlitæ spoliati, trium spirarum, rectius cochlearum, nuclei lapidei, læves, cinerei ac umbilicati, umbone parum eminente. Ex montibus calcariis insule Gothlandiæ: ubi copiosissime inveniuntur.*



16. Coc-



16. *Cochlitae minores laeves, umbilicati, cinerei.*
Ex eadem Insula.



17. *Cochlitae laeves ventricosi et umbilicati, candidi,*
saxo cinerei coloris adnati. Ex eadem Insula.



18. *Nerititae majores, striati, et secundum longitu-*
dinem spirarum quasi sulcati, saxo calcario can-
dido profunde immersi. Ex eadem Insula.



19. *Lapis cinereus Turbinita minori conchitis ac*
Entrochis exiguis gravidus, inventus in agro
quodam prope templum Warnisföensi in Scania.
a. Anticum Turbinita et Entrochis; b. postu-
cum conchitis exiguis refertum.




20. *Turbitites laevis major*, ad, extra ad sinistram convolutus, sex spirarum; lapidi calcario cinereo immersus. Ex Gothlandia.



21. *Turbinis marini nucleus lapideus laevis*, apice suo privatus. Ex Gothlandia.



22. Turbinis nucleus lapidefactus prope Stig-
bergam, pagum haud procul ab urbe Göttes-
burgo.



THE UNIVERSITY OF CHICAGO PRESS
1207 EAST 58TH STREET
CHICAGO, ILL. 60637

THE UNIVERSITY OF CHICAGO PRESS
1207 EAST 58TH STREET
CHICAGO, ILL. 60637

